

T R E V E R I S



TREVERIS, magnitudine rerum gestarum, & vetustate præclara ciuitas, Gallia Belgica caput, ante Christi aduentum 1947. temporibus Abrahæ, à Trebeta, Nini filio condita, qui à Semiramide matre, ex Assyria profligatus, Vel, vti annales Treuironum perhibet, effrenem & iniquam matris libidinem fugiens, ex regno, cum magno Assyriorum agmine, secessit, & post varios errores itinerum, ad amœnam quandam vallem natura loci munitam, iuxta Mosellam deuenit. vbi à suo nomine, ciuitatem hanc, condere cœpit. Cuius antiquitatem, trecentis & mille annis, ante urbem Romanam, perscrutatus est Aeneas Syluius. Hæc, quantum olim potentia, opibus, alijsq; ornamentis floruerit, superbissimorum ædificiorum ruinæ, manifestè ostendunt. Videtur enim ibi stupendi operis palatium, quod instar Babylonici muri, ex cocto latere factum, tantæ firmitatis hodie manet, vt nulla arte frangi queat. Proprium semper Ducem habuit. A Iulio expugnata, vt in commentarijs habemus. A Materno lege Christiana imbuta est, inde ab Attila diruta, concidit. Vltimus eorum dux luxuriosissimus, à Lucio occisus est, & Clodoueo Francorum Regi, vrbs tradebatur. Inde, tempore Iouiniani, iterum destruebatur, & per Ottones, & Henricos, ad Imperium redacta est. Ante Iulium semper in amicitia Romanorum degit, vt Cæsar lib. 2. scribit, inde Neruijs auxilium miserunt contra Cæsarem, iratus Iulius, T. Labienum cum equitatu, cōtra ipsos deputauit, & dum Cæsar à Gallia egressus est, Treuiri sollicitabant Cifrenhanos, & tunc duos duces habuerunt, Cingentoricem Cæsaris amicum & Iudiciamorum, vt lib. 5. Comment. testatus est ipse Cæsar. Vltimò autē, Labienus ipsos cepit duabus adiunctis legionibus, & 15. auxiliaribus copijs Germanorum, vt lib. 6. Cæsar asserit. Franci enim etiā Treuerim incenderunt, tempore Theodomiri Frācorum Regis, Hunibaldo teste. Plura vide apud Franci. Irenicum. Antiquissima totius Germaniæ Vniuersitate, Treuirensium ciuitas insignitur. Archiepiscopum, in Electorum ordine, agnoscit dominum. Treuironum fines, olim Rhenum attingebant, & etiamnum attingunt. Vnde Cæsar illos Rheno proximos esse ait. Qui eodem auctore longè plurimum totius Gallie equitatu valebant, magnasq; habebant copias peditum. Pomponius Mela, clarissimos Belgarum tradit esse Treuiros, & horum opulentissimum oppidum, Augustam Treuironum vocari, cuius & Ptolemæus meminit. Corn. Tacitus Coloniam Treuironum subinde nominat. Scribit Cæsar Treuironum ciuitatem propter Germaniæ vicinitatem, cottidianis exercitatum bellis, cultu & feritate, non multum Germanis ab similem fuisse, neq; imperata vnquam, nisi exercitu coactam, fecisse.

C O N F L V E N T I A



CONFLVENTIA, oppidum Gallia, inter Moguntinam & Coloniam, Episcopo Treuerensi paret. Hic Mosella, quæ Ptolemæo Obrinca, ex Vogeso monte oriens, multis admissis amnibus, Rheno magno cum impetu commiscetur, vt longissimo tractu, diuersa vtriusq; fluminis aqua, ob diuersitatem coloris, conspici, & discerni queat, leuam Mosella, dexteram Rheno obtinente. Oppidum hoc commendat antiquitas, sicut & reliquas omnes confluentes vrbes, quarum non pauca iuxta Rhenum inueniuntur. Studuerunt enim veteres in huiusmodi confluentijs condere ciuitates & arces, quod ea loca tutiora sint, ac munitiora, & deinde multas commoditates ab amnibus habeant. A confluento datū oppido nomen. Iuxta Mosellam habitatoribus frequens, pulcherrimarumq; medium serie, ad pontem vsq; summo ornatu deducta, egregiè nitet. Bina Canonorum Collegia habet, ædes sacras augustas, Teutoniam domum, aliaq; cœnobia, Palatium item Principis amplum, & homines (asserente Doctore Richuuino) emuncte naris, ingenijsq; bene dotatos & excultos, qui nescio quid Atticum omnes spirant. Vtraque Mosellæ ripa eximij operis ponte coniungitur, qui ex quadratis lapidibus pilis longo ordine arcuatim constructis, innititur, & ex Inferiore Germania in Superiorem tendentibus, transitum per hoc oppidum præbet. Ex opposito ad dexterum Rheni latus, in summo montis culmine Reuerend. Treuirensis Castrum est, Erenbretstein, validis munitum saxis ac turribus, omnisq; generis machinis bellicis, puluere item, ac globis instructissimum, ex quo Confluentini in officio retineri, ex Rheno etiam atq; Mosella, ingrati hospites per commodè arceri possunt. In montis radice, Molhemia pagus est, in quo Monachorum cœnobium, & acidi saporis fons vberimus, qui solus huic oppido potum largitur. Complures historicos, qui huius oppidi meminerunt, Franciscus Irenicus lib. II. Exegeleos Germaniæ recenset: vide etiam eius descriptiunculam Doctore Richuuini in Munsteri Cosinographia.

R O T E N B V R G V M.



BINA huius nominis oppida Germania habet, Alterum in Sueuia ad Neccarum flumen, ob occisum ibidem Episcopum Argentinensem, euersum, ac dirutum: Alterum, in Franconia Imperiale, ad Tubarum amnem, cuius hoc libro topographica pictura proponitur.